



Kamis, 11 Januari 2024
Ogen: Miha 5:5b-15



Desken Lau Malem



Adi mentas kita bas pultak matawari arah penatapen Doulu, lit sada ingan i tepi dalam si dem alu ingan binaga jong, maka si idah remang si ncabini sekelewet penatapen e. Kalak si i Medan ntah daerah hawa panas, meriah akapna ngidah remang, ntah pe embun e. Tapi man si maba kendaraan mawen embun e banci ngolangi kelancaren erkiteken dalam meremang. Israel ikataken desken Lau Malem (Indonesia; embun) i bas ogenta Miha 5. Sabap bas paksa kata e isehken maka bangsa Israel si mbue ndube si tading i taneh Juda enggo tading piga-piga nari ngenca, desken embun si bagi butir-butir lau si sitik adi ibandingken ras lau udan. Tapi amin bage gia, sitik nari pe ngenca bangsa e, si sitik e pagi ibahan Dibata jadi si maba ate malem man bangsa-bangsa, adi kin bangsa enda tetap setia ras jera bas dosana nari. Tuhan alu gegehNa si mpesikap ngulahi kecibal bangsaNa. Reh pe pagi musuh, Tuhan erbahanca rencana ras tindakan naluken musuh-musuh e, Israel desken singa si erkuasa. Kerina si ngeliami bangsa e, ngolangisa ersembah man Tuhan, iruntuhkan, iradaskenNa, gelah banci ersada ras IA.

Paksa nai kegeluhenta banci saja la bagi ukurta, lit piga-piga hal si jadi bas masa si nggo lewat si ncedai ras erbahanca kita la kuh, la serta. La kap arapken Tuhan kita serta. Desken Lau malem (embun), kita banci saja la menyadari maka kehadirenta mereken kiniulin, arapen kerna kegeluhen ras kesempatan bertumbuh man kalak si deban. Adi embun kentisik nge ngenca teridah kenca si e lesap, ninta nge. Tapi labo kap e tujun hadirta ibahan Dibata ku doni enda. Kita la perlu teridah, lau si maba kemalemen e, labo ndekah memang teridah tapi ulih kehadirenta ras ngaruh arah kehadirenta lalap tergejab ras terakap nandangi kalak si ngasup ngergakenca.